

## বরিশাল শিক্ষা বোর্ড উত্তরপত্র মূল্যায়নে অবহেলা, অব্যাহতি ১৩০ পরীক্ষককে বরিশাল যুরো

বরিশাল নগরীর তিন বিদ্যালয়ের পরীক্ষকসহ ১৩০ জনকে দায়িত্ব থেকে অব্যাহতি দিয়েছে শিক্ষা বোর্ড। ২০১৭ সালের সেকেন্ডারি স্কুল সার্টিফিকেট (এসএসসি) পরীক্ষার উত্তরপত্র মূল্যায়নে অবহেলার কারণে এ অব্যাহতি দেয়া হল। তাদেরকে দুই মেয়াদে শাস্তি দিয়েছে বরিশাল মাধ্যমিক ও উচ্চ মাধ্যমিক শিক্ষা বোর্ড। ফলে 'ঘ' শ্রেণীভুক্ত ৮৬ জন ২০১৮ সালের সব পরীক্ষার হলের দায়িত্বসহ উত্তরপত্র মূল্যায়ন থেকে এবং 'ঙ' শ্রেণীভুক্ত ৪৪ জন ২০১৮ ও '১৯' সালের পরীক্ষার হলের দায়িত্বসহ উত্তরপত্র মূল্যায়ন থেকে বাদ পড়েছেন।

গুরুবার বরিশাল মাধ্যমিক ও উচ্চ মাধ্যমিক শিক্ষা বোর্ডের ওয়েবসাইটে দেয়া বিজ্ঞপ্তিতে বিষয়টি জানানো

■ পৃষ্ঠা ১৯ : কলাম ৪

## উত্তরপত্র মূল্যায়নে (শেষ পৃষ্ঠার পর)

হয়েছে।

পরীক্ষা নিয়ন্ত্রক আনোয়ারুল আজিম বিজ্ঞপ্তিতে স্বাক্ষর করেছেন। বিজ্ঞপ্তিতে জানা যায়, ২০১৭ সালের এসএসসি পরীক্ষার বেশ কয়েকজন পরীক্ষক উত্তরপত্র সঠিকভাবে যাচাই করেননি। নিজেদের ইচ্ছেমতো উত্তরপত্রগুলো মূল্যায়ন করেছেন। ফলে অনেক পরীক্ষার্থীর জিপিএ পরিবর্তন হয়েছে। পরে তারা পুনর্নির্ধারণের জন্য আবেদন করলে ফল পরিবর্তন হয়। এতে তাদের দায়িত্বে অবহেলার বিষয়টি বোর্ড কর্তৃপক্ষের নজরে এসেছে। উত্তরপত্র সঠিকভাবে মূল্যায়ন করা পরীক্ষকদের নৈতিক দায়িত্ব। তারা সেই দায়িত্ব পালনে অবহেলা করেছেন। ফলে ওই পরীক্ষকদের দায়িত্ব থেকে সাময়িক অব্যাহতি দেয়া হয়েছে। এদের মধ্যে বরিশাল নগরীর সরকারি জিলা স্কুলের সহকারী শিক্ষক খলিলুর রহমান, উদয়ন মাধ্যমিক বিদ্যালয়ের সহকারী শিক্ষক শফিকুল ইসলাম ও শেরবাংলা বালিকা মাধ্যমিক বিদ্যালয়ের সহকারী শিক্ষিকা ফেরদৌসি বেগমসহ বরিশাল জেলায় 'ঘ' শ্রেণীভুক্ত ১৯ জন পরীক্ষক, পটুয়াখালীতে ২২ জন, ভোলায় ১৬ জন, বরগুনা ১৮ জন, পিরোজপুরে ৫ জন এবং ঝালকাঠিতে ৪ জন। অপরদিকে 'ঙ' শ্রেণীভুক্ত বরিশাল জেলায় রয়েছেন ১০ জন, পটুয়াখালীতে ১৩ জন, ভোলায় ৮ জন, বরগুনা ৭ জন, পিরোজপুরে ২ জন ও ঝালকাঠিতে ৬ জন অব্যাহতি পেয়েছেন।

বরিশাল মাধ্যমিক ও উচ্চ মাধ্যমিক শিক্ষা বোর্ডের চেয়ারম্যান মু. জিয়াউল হক জানান, দায়িত্বে অবহেলাকারী পরীক্ষকদের শাস্তির মেয়াদ শেষে তাদের বিষয়টি পুনর্বিবেচনা করা হবে। এরপরও তারা পরীক্ষকের দায়িত্ব পালন করতে পারবে কি না সে বিষয়েও সিদ্ধান্ত হবে।